

修訂日期: 2004/10/13 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 14, No. 547

原始資料: 蕭鎮國大德提供, 維習安大德提供之高麗藏 CD 經文, 北美某大德提供

## No. 547

### 大花嚴長者問佛那羅延力經

#### 罽賓國三藏般若共利言譯

如是我聞。一時薄伽梵。在室羅筏悉底國逝多林給孤獨園。時大花嚴長者。從坐而起整理衣服。長跪合掌而白佛言。大德世尊。一切有情施飲食者。當得何報。

爾時薄伽梵告長者言。若施食者。得如來力。時大長者復白佛言。世尊。其如來力。頗有譬喻而能宣說。令我聞不。

佛告長者言。有善男子。不可以少因緣而能說之。復告長者。如十凡牛力。等一犂牛力十犂牛力等一犀牛力。十犀牛力等一凡象力。十凡象力等一設臘婆力(形如麀面似犀牛身有八脚四在背上四踞地行下足若困翻上憩令上足下履地而行力能負象)十設臘婆力等一鬪戰象力。十鬪戰象力等一醉象力。十醉象力等一野象力。十野象力等一羯嚟耨迦象力。十羯嚟耨迦象力。等一拘牟頭花象力。十拘牟頭花象力。等一嚙鉢羅花象力。十嚙鉢羅花象力。等一寧盧鉢羅象力。十寧盧鉢羅象力。等一大香象力。十大香象力。等一五色師子王力。十師子王力。等一人中力士力。十力士力。等一諾拘羅力。十諾拘羅力。等一邊主那力。十邊主那力。等一毘摩細那力。十毘摩細那力。等一那羅延力。六百六十三那羅延力。等佛世尊一毛孔力。八萬四千毛孔之中。一一皆具如是那羅延力。八萬四千毛孔之力。等薄伽梵一節之力。

佛告長者。以是當知諸佛如來一一節中。皆具八萬四千六百六十三種那羅延力。

佛說此經已。大花嚴長者。聞佛所說歡喜奉行。

### 大花嚴長者問佛那羅延力經